

# Lehmder Vertellsel von Krusen August

(Fortsetzung von AE 08-2000 & 10-2001)

## August uppe Jagd

Ja nich, - min Brauer Franz, dat wör ein erfahrener Jäger; dor wör hei uck allgemein för bekannt. Hei har uck'n ganz besten Jagdhund, dei hütt Togo. Ja nich, - dei wör klau-ker at manche Jäger. Ja nich, - eines Daogs segg min Brauer Franz, „August wullt du uck es maol nen Haosen scheiten?“ Ja nich, - dat wull ick woll gern.

Min Brauer Franz haolde den Püster, hei laode dei Flinten un dö mi uck noch ein paor Patronen inner Taschken mit. Dunn segg hei tau mi: „Stell die dor man achtern Haogen hen, un dann laot den Togo man säuken.“

Ja nich, - dat dürdfe nich lang'n, dunn kreg Togo alln Haosen hoch un dreef denn för mi langes. Ja nich, - ick schöt zweimaol, aower dei Haose löp witer, un Togo daor achter her. Ja nich, - min Brauer Franz har tau mi seggt, du maos up din Platz staon blieb'n, dei Togo bring di den Haosen van enien werrer her.

Ja nich, - ick laode wer dör und teufde dann. Up einmaol hörde ick dann, dat Togo in die Wietde wer

anschlög. Dunn dürde dat uck nich lange, dunn kömp dei Haose weer vör mi langes. Ick schöt weer zweimaol - weer nicks.

Ja nich, - at dann Togo so an mi vörbilöp, keek hei mi ganz wann-schaopen tau un schüttelköppde, aower ick blew noch werrer up min Platz staon, dat dürde dann ein ziemliche Tied, at Togo nochmaol mit den Haosen vörbikömp.

Ja nich, - ick schöt weer zweimaol, un dei Haose löp weer wegg. Togo bleev nu staon un kömp up mi tau. At hei nun gegen mi wör, dunn keek hei mi tau, schüddelköppde weer, un dachde sicher, mit denn iss uck nicks antaufangen, un löp nao hus.

Ja nich, - wat schull August uk maoken, hei güng' de achterher.

## August ha veel tauveel drunken

Ja nich, - August kömp es maol richtich besaopen nao hus. Toni, wat sine Frau wör, braochde üm inne Kammer und hei setde sick uppe Bettkante und segg: „Mama, nu tregg mi man dei Schaeue ut, dann stöt mi man üm'm und laot mi man liggn.“